



29. oktober 2018

UKA2018/162

Kalaallit Qallunaat Nunaanni ilinniagaqartut ineqarnikkut amerlanernik periarfissinneqarnissaannut Naalakkersuisut pisariaqartitsinermik inissanillu amerlanernik pissarsisinnaanermik misissuinnissamik peqquneqarnissaannut Inatsisartuni aalajangiiffigissatut siunnersuut.

(Aleqa Hammond, Nunatta Qitornai)

Mimi Karlsen IA-meersoq siunnersuuteqarpoq Danmarkimi ilinniartuutitta ineqarnikkut ineqarniarnikkut amerlanerusunik periarfissaqarnerulernissaannik naalakkersuisut suliaqassasut.

Qujanartumik nunatsinni ilinniagarineqarsinnaasut toqqarneqarsinnaasut amerliartorput aammalu nunatta avataani ilinniarusussuseq annertuvoq. Ilinniagaqarlutik naammaassisimasorpasuit ullumikkut inuiaqatigiinni nukittoqutigigaakkavut qujanarput aammalu taamatut angusaqarniarnerminni tamatigut oqittuinnarnik atugaqarneq ajorput. Ilaatigut ilinniakkaminni tapeqartinneqarneq ajorlutik ilungersorlutik angajoqqaaminnit annertuumik tapersorsorneqarnermikkut angusarissartut takusarpavut. Qasusuillutik tunniutiinnajuissutsimikkullu nukeqarlutik silatuussusertik upperalugu angusarissartut nasaarfissaapput.

Ilarpassuaqarput ullumikkut ilinniagaqarniarlutik aallartinniarnerminni danmarkimi inissaqarniarneq eqqarsaatigalugu assut nukissaq atorlugu nassaarniartarneq ajornartorsiutigineqartartoq. Ilinniagaqartut peqatigiiffiata AVALAK-ip saaqummersittakkaminni ajornartorsiutip qaangerniarnernut annertuumik tusaaneqarnissaminnik oqariartortarnerat tamatta tusaasariaqarparput.

Danmarkimut pitilluni ilinniakkamut nukissaq atortussaagaluarlugu inissarsiorneq, inissiffissarsigallarniarneq aammalu inissaqarniarnerup kollegiassaaleqinerullu kingunerisaanik ilinniartuutivut aallartinnerlussinnaasut ilisimaaraarput.

Savalimmiormiut aammalu Islandermiut Danmarkimi ilinniariartartuutaat ataatsimuukannersumik kollegiaqarfeqarput assorsuaq uagut ilinniartuutitsinnut sanilliullugu atugarissaartitaanerullutik isumagineqarnerusutullu inissisimallutik. Uagut aamma ilinniartuutigut tunuliaqutserneruniarutsigit assigisumik aaqqissuussisinnaaneq ujartortariaqarparput.

Naalakkersuisut siunersuummut tapersiinerat nuannerpoq, aammalu tamarmik sulilluarnissaannik kissaappavut kalaallit illuutivut peqatigalugit, danmarkimi kommunit ilinniartuuteqarfigisavut peqatigalugit aammalu minnerunngitsumik danskit naalakkersuisui suleqatigalugit angusassaq angutserlugu sulinissaq avaqqunneqarsinnaanngitsut pitsaasorli anguneqarniarili.

Taamatut oqaaseqarluta siunnersuut ilinniartitaanermut ataatsimiititaliamut ingerlateqqipparput peqqissaartumillu sulilluarnissaannik kissaallugit.